

فهمي علي نصر

والصبح مجاش

أشعار بالعامية المصرية

الطبعة الأولى ٢٠١٨



بطاقة الكتاب

عنوان المؤلف : والصبح ماجاش
المؤلف : م. فهمي علي نصر
التصنيف : أشعار بالعامية المصرية
رقم الإيداع : ٢٠١٨-١٠٧٨٤
الترقيم الدولي : ٩٧٨-٩٧٧-٨٥٣٩٠-٨-٠
عدد الصفحات : ١٣٠ صفحة
رقم الإصدار الداخلي : ١٨٨
تاريخ الإصدار الداخلي : مايو ٢٠١٨ طبعة أولى
تصميم الغلاف والتنسيق : الشاعرة منى الغريب

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

ثورة مصرية تشرق إبداعاً على الوطن العربي

المدير العام
جابر الزهيري

رئيس مجلس الإدارة
ناجي عبد المنعم



دار
النيل والفرات
للنشر والتوزيع
أسسها الشاعر ناجي عبد المنعم

رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572
عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 - فاكس: 020554372901
البريد الإلكتروني: alnilwaalfourat@gmail.com - alnilwaalfourat

المقر الرئيسي: ج.م.ع محافظة الشرقية - العاشر من رمضان - مجاورة 13 - أمام سنتر الـ 13 - عقار 304
ج.م.ع محافظة المنيا - أبو قرقاص - شرق النعمة - خلف محطة السكة الحديد - هاتف 086214428
ج.م.ع محافظة القليوبية - مركز طوخ - إسماعيل - هاتف 0132424735 (الغروب)

إهداء

إلى

واحد

كان تايه

و لقي نفسه

في

حبة كلمات

بتعبر

عنه

.....

م . فهمي علي نصر



بنوتة رقيقة

و اسيب ف شفايفك ضحكاية
و استنى أشوفها اما بتكبر
كام يوم .. كام ليلة .. أنا مش هانسى
من بصة عليكى أكيد هاسكر
مش هازهق و انا عيني عليكى
و عشان انا عاشقك .. فانا هاصبر
و الصبر أكيد مش هيطول
و ان طول .. راح أقول متقدر
متقدر إني أكون بيكي
ما انا بيكي باحب الليل و اسهر
و ف سهري باسافر و بشوقي
فباحسّ الليل دايمًا يقصر
يقصر و يجيب لي نهار طيب
بيشوفك حلوة فيتمخطر

اتمخطر يا الصبح و عدي
يا ابو فجر رقيق جايّ مبدر
يا مبدر و تملّي بتجري
فالوقت يفوت نسمة بتسحر
و السحر يحرك في مشاعري
أحلام و أمانى بتتفسر
هاستنى الضحكة و هاحضنها
بنوتة رقيقة ... بتتغندر

.....



خطاوي

الباب ف لحظة اتقفل
ع الضحكة و نسيني
خد مني فرحة رضا
كانت هتحييني
ما اعرفش ليه .. إنما
دمعي ملا عيني
و همومي زادت أوي
ما في حد يواسيني
على غفلة شوفت الفرج
خضّر بساتيني
حسيت بر عشة صفا
قادرة تصحيني
الصدر فياً انشرح
فرجعت بسنيني

حسيت بذنبي اتغفر

و الراحة بتجيني

يا رب يا مطلع

ع النفس .. قويني

و خد بايدي إليك

طهرني ... نقيني

افتح لي باب سكتك

عشمان تنادينني

أبدأ خطاوي إليك

محفوظة بيقيني

....

ضحكة توهة

الضحكة عشان مش مرتاحة

بتخلي دموعك تستنى

لو كانت براحتها و صافية

كات خطفت روحك للجنة

كات سابت فيك ألف علامة

أولهم قلبك .. كان غنى

كات روحك حضنت ..

أوي روحك

أو قالت .. إحلم و اتمنى

إنما علشان ضحكة توهة

فبتمشي أوام و بتتخفى

ماهو فيك لسا ..

وجعك صاحي

و ميزانك بيميل بالكفة

و همومك مش ناوية تسبيك
و الريح بتعانده في الدقة
و المركب بتميل من موجة
و الخوف بيزيد ما بيستكفى
لملم أحاسيسك و مشاعرك
و شتات جواك ساكن قلبك
و ارجع من تاني بأيامك
هات نفسك .. سگنها ف جنبك
أو قرّب من حد تحسه
و حاجات بينكم بتقول حبك
إتكلم و احكي و لا تخبي
فضفض ...

ما تخافش بيان صَبَّك
حاول مرات و اوعاك تياس
أو تزهق و تقول مش هاقدر
لأ .. تفرق جدّا .. صدقني
علشان ما يجيش يوم تتحسّر

ف الدنيا قلوب حلوة و صافية
و قلوب م الهمّ بتتكسر
و قلوب تداويلك في جراحك
و قلوب تنساك .. و تقول أصبر
....

صاحبى

صاحبى ياللى هربت منى
وقت شدة .. ما شيلتنيش
ياللى ياما قسيت عليا
كنت انا عايزك تعيش
مش مهم جروحي توسع
مش مهم أروح ما اجيش
كنت أقرب حد ليا
كنت طير و انا روجي ريش
ليه تبيع أحلام عزيزة
ليه تروح و تقول مفيش
عمرى يوم ما زهقت منك
و لآ قلت خلاص كفاية
كنت شايلك بين ضلوعي
كل أسرار الحكاية

كنت أول حد أقول له
كل حاجة من البداية
كنت باستتناك ليلاتي
قبل أهلي و قبل ناسي
كنت بابكي قبل منك
و إفتكر لو كنت ناسي
كنت باقرا من عيونك
اللي فيك من غير ما تحكي
كنت باسمع لك تملّي
و ابقى منديل لما تبكي
مش هاقول غير كنت صاحبي
بس كنت .. دى فعل ماضي
مش هيبقى ف يوم مضارع
و ان بقى ..
مش هابقى راضي

....

أُذِرُونِي

أُذِرُونِي أَصْلَ جَرْحِي

جَوْهَ رُوحِي مَشَ شَوِيَّةَ

جَرْحِ كُلِّ دَقِيقَةٍ يَكْبُرُ

فَالدَّمُوعُ تَسْكُنُ عَنِيَا

طَعْمُ كُلِّ الْحُلُومِ مَرَّرَ

لَمَّا بَحَرَ الْقَسْوَةَ فَاضَ

مَوْجُهُ زَادَ غَرَّقَ سَفِينَتِي

وَالشَّرَاعُ خَالِي الْوَفَاضِ

رِيحُ مَعَاكِسَةٍ ...

وَدَقَّةً تَائِهَةً

وَالصَّوَارِي نَوْرَهَا طَافِي

مَجْدَافِينَ ... خَانَهُمْ زَمَانِي

رَغْمَ أَنَّ الْقَلْبَ صَافِي

بَسْ قَلْبِي رَغْمَ طَيِّبَتِهِ

طبيته طلعت كل عيبه
قدم اللي سعره غالي
الرخيص جه من نصيبه

....

حرف القصيدة

حرف القصيدة هرب
رافض يكون مكتوب
و كل ما يقترب
يحلف هيبقى كذوب
بيقول علينا همج
و رعا ع ما نستاهل
نبيع ف أرواحنا
و نسيبها بالساهل
بيفوت علينا نهار
إسود و ليله طويل
تبكى العيون و تنوح
نحزن بألف دليل
تاني يوم نروح ننسى
و الضحكة تبقى براح

و قلوب أوام تقسى
و كأن حد ما راح
على ماتش في الكورة
على فيلم ف السима
و بلدنا موجوعة..
و بتفقد القيمة
الأفاقين فيها..
على كل شكل و لون
حتى ف حواريتها
العقل بقى مجنون
يا ربنا الرحمة
على أمة ما بتفهمش
سايبية الكلاب تعوي
سهرانة و ما بتنامش
و مصدقة الكدبة
قال ايه بنطلع فوق
يا شعب بقى لعبة

اصحى ف مرة و فوق

افتح ببيان بكرة

يا شعب صح النوم

بقى كل ده و انت

نايم و مش بتقوم

يا ايدين و بتصقف

و عيون ما بتشوفشى

و عقول أصابها خمول

جاهلة ما تعرفشى

آخر الرواية موت

....

حاجات خايفة

و لما الفرح يتأخر
على قلبك و ما يهّلش
و بردو الضحكة تتدارى
و را الدمعة وما تتطلّش
و تبقى عنيك ما بتشوفشي
حاجات كانت زمان حلوة
و تبقى الذكريات مرة ...
و لو حتى تكون غنوة
أكيد جواك حاجات خايفة ..
و مالية الروح وجع و سكات
أكيد يومك ماهوش شبيهك ..
و حاسس إن حلمك مات
أكيد فيه شرخ مش باين
لكن ساكن بعيد في الروح

مخبي نفسه في التوهة
و مش عارف في لحظة يبوح
فمد ايديك على طولها
و طبطب ع اللي نفسك فيه
و عاهده تبقى يوم ... هو ...
و ما تفكرش تقسى عليه
يسافر زيّ ما يسافر
و يرجعك بشئ يرضيه
....

عُقْدُ الغرام

مش هابقي ليكي الدوا
و الاقيكي وجعاني
يا سايبه قَيَّا البكا
و النفس بتعاني
ياما ناديت ضحكك
ياما شحت حروف
علشان تحسي الرضا
ليه تغرقى ف الخوف
بافرد رموشي غطا
بالليل و اقول نامي
و استنى لوتحضري
مرة في أحلامي
يملاني شوفك دفا
و ارتاح و لو أحلام

لا طلبت منك خطأ
و لا قولت مرة بكام
يا أول المبتدا ...
أنا آخر العشاق
و انا اللي زارع رضا
و لهمستك باشتاق
بحق لحظة صفا
بيننا .. كفاية عتاب
قومي بينا نخلق فرح
نفتح ف مرة الباب
عُقد الغرام لو فرط
صعب اننا نلّمه
ندوق حلاوة الهوى
و بلاش ندوق سمه

....

ذکری یوم

سبیتی لیه صورتک ف عینی
و انتی ناویة ع البعاد
و لا انا راح ابقى لیکى
ذکری یوم فاتہ الميعاد
و لا کام کلمة نسيتهم
و الحروف على غفلة ضاعت
دنیا فعلا ای حاجة
إنتی بیعتی و هی باعت
ده انتی فیّا الحلم کله
و السنین قبل اما أقابلك
شوفي قلبي لما ضمک
و اما لَمّ الشوق و جابلك
و اما حسّ الخوف ف روحک
و الوجع ساکن جروحک

و ف سكاتك و لا بوحك
عاش ف نار و الفرح سابلك
ليه في لحظة تقولي نبعد
و احنا وقت البعد موتنا
كنتي تايهة و كنت خايف
لما مرة طال سكوتنا
تخلفي ليه عهد روحك
و انتي روحك هي روعي
ليه باداوي الجرح فيكي
و انتي بتزيدي ف جروحي
مستحيل أحلامنا تدبل
أو أسيبك تخنقيها
مستحيل الدنيا تضحك
تخلي دمع ف عنيتها
ليه كدا بتخافي بكرة
بكرة دا بايدينا إحنا
مستحيل هيهون علينا

إنه يبقى ف يوم جارحنا
أوعدك هامسك إيديكي
و مش هاسيبك مهما كان
نفس مسكة يوم لقانا
لما حسيتي بأمان
و اوعدك و لا يوم تهوني
و ف عيوني يبقى بيتك
من رموشي يكون غطاكي
حب عمري والتقيتك
و ابقى ليكي شمعة قايدة
نورها يبقى لك حياة
و ابقى ضحكة فوق شفايفك
تنسي بيها كل آه
....

إفتحيلي

إفتحيلي مرة بابك

و اذكريني بين صحابك

و اعرفي إني ف رحابك

بأبقى طير بجناح و ريش

ضمي ع الأحلام دراعك

حضني دافي و راح يساعك

و انسي مين هانك و باعك

و اللي قالك يوم مفيش

و اوعي تنسي انك حبيبتى

لو حضرتي و مهما غيبتى

و لا خدتى و لا جبيتى

اللي بينا ما ينتهيش

الحكاية انك نسيتى

إن جوه عنيكى بيتي

مهما روحتي و لا جيتي
عشقي ليكي ما يتنسّيش
لّسه دمي بيروي أرضك
لّسه روحي هي عرضك
سنتك و الأصل فرضك
ليه يا غالية ما بتشوفيش
عمري ما فرّطت فيكي
و لا سيبت ف يوم إيدكي
قلبي دايمًا بيناديكي
بس ليه ما بتسمعيش
نفسى اشوفك شابة عايقة
و ف عنيكى الدنيا رايقة
نفسى مرة تبقي فايقة
فَتَّحي ... ما تغمضيش
نيلك المخنوق ... خسارة
و الهرم .. يا أم الحضارة
دا انتى فيكى ١٠٠ أمارّة

إضحكي .. ما تعيطيش
راكنة ليه سيفك وراكي
خانقة ليه نجم ف سماكي
و احنا أرواحنا فداكي
صدقينا عشان نعيش
صدقيني الليل دا غاير
و الأمل خلف الستائر
نادي بس ولاد يناير
و احضنهم ما تخافيش
هتلاقهم تحت أمرك
عمر دايب جوه عمرك
يطفو نارك .. يبقو جمرك
ما انتي غيرهم ما تلاقيش
....

لحظة اشتياق

ما بلاش نروح للي مضى
و اللي انقضى ..
ما خلاص دا فات
خلينا نعشق بعضنا .. على أدنا
و نعيش حاجات
و نقول لبكره بيتدى ..
و ان حب يشهد ع القلوب
يكتب حروف اسمك صفا
جواها أنا أصلا بادوب
و ف سطر عنده ... عهدنا
نفضل سوا من غير فراق
من غير وجع ... و لا نتسمع
إلا في لحظة لاشتياق

....

الصبح ماجاش

أنا الصبح اللي لسه ماجاش
و انا الذهب اللي ما يسواش
و انا الضحكة اللي مكتومة
و أحلام نفسها تتعاش
أنا الهم اللي ما بيوجعش
و انا الصرخة اللي ما تسمّعش
و طيف رايع و ما بيرجعش
و شئ يتباع لكن ببلاش
حلمت زمان أوى اكبر
و أقول الشعر .. و اعبر
و كان الجسم بيقشعر
شاور لينا و ما فهمناش
يا ريتنا فهمنا و فضلنا
عيال .. الفرح فاضلنا

لا فضل العمر عادلنا
و مهما بنجري ما بنلقاش
سافرنا و شوفنا ناس ياما
و دمع العين بقى علامة
تملي ف حزن و ندامة
و دايمنا نبقي ما لحقناش
خلاص يا دنيا بكفاية
يا بادية تملي بنهاية
و غدارة و شكّاية
يا خدعة بجد ما تسواش

.....

راجع

اللي راجع .. و اللى فارق

و اللي تاه بين المفارق

و اللي لسه ف حلمه غارق

و اللي عشان ف النجاة

كلهم ف الأصل واحد

بس دا تأثير حياة

يوم تشيلك .. يوم تحطك

و اما تنصف أو تلطك

إبقى قول م الضحكة آه

يوم يا صاحبي ما تلتقيها

و النبي تمسك إيديها

ما تناديش بشويش عليها

دا الوجد جاب منتهاه

هي مش للكل ناسية

إنما بمزاجها قاسية
عمرها ما هتبقى راسية
غدرها واصل مداه
كلها أيام بتجري
ع البشر مقسوم بيسري
ع اللي رايق و اللي فقري
و اللي شاف حلمه و نساه

....

إتْمَنِيَّتْكَ

كنت تملّي باحن إليكي
و احلف زيك عمري ما شوفت
كنت باحس الكون ف عنيك
جاهل كنت و ادينّي عرفت
كنت باشوفك بس حورية
سايبية الجنة .. و جاية تبص
اكتّم صوتي و امنع نفسي
و الأمر نبض القلب يهس
كنت ارقكي كثير من عيني
و اطلق من إحساسي بخور
خوفي عليك كثير عذبي
روحي عليك بقت ١٠٠ سور
كنت باشوفك .. بس أميرة
يبقى تعيش مش وسط الناس

تسكن قصر هناك ف العالي
روحي و قلبي عليه حراس
اتمنيتك ؟
اه اتمنيتك

تبقى حكاية كل العمر
حلم جميل لحظة ما هويتك
كانت زيّ طلوع الفجر
نسمة و لمست قلبي العاشق
و سرت منه ف كل كياني
فاما تقولي خلاص هنفارق
تبقى حكمتي ... القلب يعاني
نرجع ليه و كأني ما شوفتك
نقتل ليه حكايات كات بينا
نبقى ازاي اتنين مش واحد
و ازاي ننطق كلمة كنا
انا مش هاقبل تبقى لغيري
و لا راح اسيبك

و انسى هواكي
و لا هاختار اني ابعء عنك
زي زمان ... انا هاستناكي

....

يابكرة الجي

يا بكره الجي متخفي
و مش باين و لا واضح
هتيجي بجد تحضننا
بقلب برئ و ببسامح ؟
كدا و لا انت ناوي لنا
و مستحلف تكون جامح
تهد الضحكة جوانا
و تخنق كل صوت صادح
تدوس أرواحنا ما يهمك
و تعمل عملة امبارح

....

أعذارك

و مش هاستنى أعذارك
و لا هانسى اللى كان بينا
انا هارجع أعيش تانى
في أحلام تشبه الجنة
أحب لوحدي .. إيه يعني
لكن مش هارجع اتمنى
هيبقى خيالي مطاوعني
ماهوش واقف على الوحدة
و هاتكلم على كيفي
و هاتصاحب على الواحدة
و اشوف صوري اللي راسمها
و اسامح روعي لو جاحدة
هاشوف من تانى إحساسي
و اعيش ناسي ان انا مجروح

و اسيب حبل الأمان قِيًّا
يشد العزم .. يحيي الروح
و اخلي الكلمة ف لساني
تكون حرة .. و تشبع بوح
و مش هاسكت و اقول حاضر
عشان خاطر ما از علكيش
ف هاتكلم بكيف كيفي
و اسيب الحلم قِيًّا يعيش
و لو قلبي سأل عنك هارد عليه
و اقله ... مفيش
يجوز مرّات راح اتألم
و الاقي الدمع في عيوني
يجوز اهرب من الذكرى
عشان ما اخضعش لظنوني
لكنى أكيد ف يوم هاقدر
أكون زيك .. ف هتهوني

كلمة بحبك

يعني إيه كلمة باحبك
يعني إيه انا دوبت فيك
يعني إيه ساكن ف روعي
و ابتدت ايامي بيك
و ان سر الكون ده إنت
و اني باشتاق ابقى ليك
يعني إيه عاشقك و عشقك
دنيا مرسومة ف عنيك
يعني إيه ما تغيبش عنى
يعني إيه لحظة و هاجيك
الكلام مش كل حاجة
كل حاجة مش كلام
فيه كتير إحساس يرَّيح
فيه سماح وقت الخصام

فيه إيدين تتمد تمسح
دمعة و تداوى الآلام
فيه تعالى ف حضني و اهدا
فيه يا رب تكون تمام
فيه أنا باستنى ترجع
م البعاد قبل أما انا
و القى نفسي بعد توهة
بين إيديك و نعيش غرام
فيه نفكر نبني بكره
بيت و نملاه ابتسام
فيه اكون باغرق ف حلمك
و ابقى عايش فيه سلام
يعني إيه كلمة باحبك
غير قلوب عشقت قلوب
ابتدت تقرا ف سكوتي
و ف كلامي ازاي بادوب
و ف حاجات بتشوفها عينك

و ف دروب رايحة لدروب
و اني كل الوقت عايشك
و اني مش هاعرف اتوب
و اني بعت العمر ليكي
بعد ما غسلت الذنوب
قلبي ما اتخيلش انك
و ببساطة راح تبيع
لا .. و ناسي كل لحظة
و اللي عاش حبك يضيع
و الليالي الحلوة .. بينكم
تبقى عندك شئ فطيع
بردو انا هاتعلم أقسى
عمري ما هاكون لك مطيع
جايز انسى كل ذكرى
و ان بكيت زي الرضيع

....

الأمني الممكنة

كل الأمني الممكنة
ف الحلم ... صبحت مستحيل
و النظرة ف عيون طيبة
ع القسوة صارت ١٠٠ دليل
يا معشمين الروح كفى
الروح ما قدراش يوم تشيل
ما هو كان ميعاد جني الرضا
و استتيناها ف نهار و ليل
وقت الحصاد الشوك طرح
قلبي انجرح .. أصبح عليل

....

وجع

ملعون أبوك يا وجع
يا مشتت الأفكار
يا مالي قلب الجدع
بالحزن و الأشعار
و مكرهه ف دنيته
و معيشه في النار
شائل هموم البشر
على ضهره ليل و نهار
و ان لحظة واحدة اتعدل
تتبعثر الأسرار
فجأة يضيع الأمل
و اللي بناه ينهار
بالله عليك يا وجع
ل تسبيه مرة يفوق

مش شرط يفرح أوي
أو يطفئ نار الشوق
بكفاية ينسى الألم
و دماغه مرة تروق
يرفع عنيه للسما
و يبص بيها لفوق
علشان و رب النبي
قرب يموت مخنوق

....

دنيا سارقة

أيوه لسه الدنيا سارقة
أحلا حاجة حلمت بيها
بنت .. حلم العمر كله
بنت سحر الدنيا فيها
قربت .. فرجلي عمري
و السنين طرحت شباب
و اللي فاتني جه لحدي
جه فاتحلي ألف باب
ريقها زى الشهد طعمه
و ف عنيتها السر كله
تبتسم للشمس تضحك
فالنهار يفرح بضله
فجأة سافرت قلبي فاتني
راح معاها و سابني اموت

و الساعات وقفت مكانها
ليلها مش عايز يفوت
ناي لوحده يادوب بيعزف
لحن طعم الخوف ماليه
العيون بتفيض دموعها
و الرضا مش حاسة بيه
كل شئ في الكون دا رافض
بيتسم أو يبقى هادي
و النجوم العالية طفيت
و القمر ضلم .. ف عادي
يكبر الجرح اللي ساكن
تنزف الأحلام صفاها
لما تبقى الدنيا هاجرت
للي قلبي راح معاها

....

غمزة عين

و لو ينفع تفوتيلي
يادوب بسمة و غمزة عين
و لمسة بس بايديكي
و من إسمك و لو حرفين
عليهم هابني كون ليا
و اغني تملي للعاشقين
و هاكتب شعر من ثاني
و اتوه و اسأل .. حبيبي فين
يجوز مرة هوى روحك
يجيبك .. أو تحسى حنين

....

صورتی

و ف عیونك باشوف صورتی

و انا صغیر و حلمی بری

و اشوفها تانی ف كلامك

و احلامك و اشوفنی جرئ

الملم كل ما فیا ..

و ادفی نفسی جواکی

و احس إنك لبكره طریق

باحسك حد مش عادی

یكون هادی فیبقی صدیق

و أحياناً بتبقي طوفان

و میت برکان و شدة و ضیق

و زلزال یقتل الضحكة

و احس انی بجد غریق

یومین او یوم مانیش فاكر

و مش ناكر .. و بتفوقي
اشوفك حزن بيضطرب
و شمس الصبح و شروقي
و اشوفك ضحكة بتجلجل
فانا اتشاكل و اقول .. روقي
عشان من بسمتك روقي
بتبقي حرة من طوقي
تسافر ف السما بيكي
تهيم فيكي ...
و اقولك شهد ... فتدوقي

....

وشوش

على الوشوش علامات

و خطوط زمن عدّى

تحكي حكاوي كثير

عن عمر لم هدّى

و بتوصف الأيام

للي عرف يقرا

فوض أمورك ليه

و استحسن الفكرة

تغرق ف بحر رضاه

و تمر ما تخافشى

علشان ما تندمشى

مع من أخذ و ادى

....

كدابة

و عشان الدنيا دى كدابة
و بتقسى علينا و تخدعنا
و بتسرق أجمل أمانينا
و تمللي تشيلنا و ترزعنا
و ان ضحكت يوم لحظة ف وشك
و ايديها اتمدت بتطبطب
فدا مش معناه إنها ثابت
أو ناوية خلاص تصبح أرحب
بتخون و ان حلفت ميت مرة
إنها من أجل عنيك ثابت
هتبيعك و تقول أنا حرة
و إيديها ثوانى تكون سابت
فبلاش تعشقها و تتمنى
تملكها فى إيدك و تفكر

خليها وراك مش قدامك
و اياك من كاسها ف يوم تسكر

....

حلم حلمه

اللي شاف الدنيا إنت
مهما قسيت و لا باخت
و اللي حسك حلم حلمه
لما روحه بهمسة داخت
و اللي عاش حبك لوحدته
لما كان خايف يقولك
و اللي شايف بكره فيكي
و اللي هايم فيكي كلك
النهارده جاي و عمره
فوق كفوفه هدية ليكي
تبقى هو و يبقى انتي
و الحياة يشوفها بعينكي

....

من ثاني

نعيد من ثاني و نحاول
نشوف الدنيا بعدلها
نشوف بكره بعيون صافية
و أياмна نبذلها
أعيش جواكي و اتملّي
في أحلامك و اعادي الخوف
و تستني ف روح روحي
تحسيها على المكشوف
لا اغيب عنك و لا تغيبني
و لا بأوهمنا نتعذب
فلا قالوا و لا قولنا
و لا نسيب الظنون تكذب
فتحكيلي تفاصيلك
و انا معاكي باكون شفاف

فتبقى الدنيا دنيتنا
و فيها حينا يتشاف

....



بكره

و مين هاحلم يكون جنبي
و مين هاتمنى اعيش وياه
و مين يسكن هواه قلبي
و اسيب العمر كله معاه
أنام و انا صورته ف عنيا
و له بين الضلوع رسمة
و اقول له يا اغلا ما فيا
يا أجمل حنة في القسمة
يا صبح يشق ١٠٠ ضلمه
و ييجى لعندى و يصبح
و أحاسيس كلها حالمة
و بانية ف روجي ١٠٠ مطرح
بحق الحب ما تسافر
و لا تسييني أموت م الشوق

حبيبي .. البعد دا كافر
يبقى القلب فيه مخنوق
عاهدتك تبقى جوايا
و ما تكونشي في يوم ذكرى
فعاهدني تعيش حلمي
و نخلق كل يوم بكره

....

كل أحلامي

كل أحلامي اللي ماتت
بين قلوب الناس حرام
الأمل و يا الأمانى
و الرضا و الإبتسام
و اللي كان ع الشط واقف
و ف إيديه شايل سلام
و اللي كان للناس محبة
و اللي كان يمسح الأم
داسو فيهم غصب عني
و ابتدو يقولوا ف كلام
كله غيبة و كذب فاجر
ردوا ع الضحكة بخصام
يا اللي بعت حاجات ما بينا
قوللي كان السعر كام ؟

و اما بعت .. ارتحت منها
يعني .. حسيت بالوئام ؟
و لا اقولك ... مش هاعتبك
مش هاعيش تاني ف زحام
النهارده بقيت لوحدي
م النهارده يادوب هانام

....

جوه الروح

الشعر لا هو حرفة
و لا مهنة موروثة
و لا فيض حروف جاهزة
و لا كلمة متعوسة
الشعر ميت حاجة
من جوه جوه الروح
من باب بعيد جدًا
و تملّئ مش مفتوح
الشعر سور عالى
و عليه كثير حراس
لا بيقبلوا الرشوة
و لا يستحووا م الناس
رزق و ساعات ينزل
بتلموا ف سطورك

يطلع كلام طيب
لابس هدوم نورك
و ساعات كثير يهرب
و يتوه و لا يرجع
تبقى الحروف كالسيل
و مفيش سدود تجمع
نظمك دليل ضدك
و الوزن يلعب بيبك
موضوع صحيح يسحر
و القافية عاصية عليك
ع الوحي تتحايل
و تبوس إيديه ... يجافيك
يكسر سنون قلمك
فالحبر ما يكفيك
ساعتها صدقتني
انساه و قول له بلاش
شخبط في أوراقك

أو شوف حاجات تتعاش

على غفلة هايجيلاك

مشتاق و يترجاك

و حروفه تخضعلاك

فاكتب ... عشان نقراك

....

حاجات بتضيع

و ف روحك لسه حاجات بتضيع
و حاجات بتخاف لتكون مواضيع
فبتجري و ترمي هموم جواك
مع إن ف قلبك طفل رضيع
ما تسبيك بقى من شوف بعنيك
و تصدق فيك حبة أحاسيس
مش معنى كلام اتقالك يوم
الحلم يكون جواك كوابيس
صدقك كتير قصة و حكايات
و بنيت ف الوهم بيوت و قصور
طب لما لقيت القول كداب
ليه عشت الضلمة و سبيت النور
ما هى باينة أهى و إحساسك قال
إن المشوار ف الآخر زيف

و لَّا انت خلاص روحك كارهاك
و دموعك صبحت عندك كيف
بتروح لبعيد في كلام معسول
و بترجع تنسى و تبقى سعيد
ما حاولتش مرة تقول ده حرام
مع إن النار جواك بتزيد
ما تبص وراك و تشوف فات كام
دي سنين من عمرك ضايعة بلاش
لو منك كنت دبحت الخوف
و خلقت في روعي حاجات تتعاش

....

قصايد يتيمة

كل القسايد يتيمة
و دموعها باينالي
و بترمي فيا الوجد
ما انا اصلي مش خالي
يا معيشاني بعيد...
و تملّي ظلماني
يا جارية جوه الوريد
ما تخفّي أحزاني
لساني ماكرهتكيش
و لا عمري يوم راح أكون
كل اللي بيكي خيال
جايز يكون مجنون
ما تصارحي نفسك بقي
و سيببها على ربك

ما تحلميش بالشقى
مع قلب عاش حابك
بالله عليكى أنا
محتاج أوي ارتاح
و انسى كلام مش لنا
و ف حضنك ألقى براح
محتاج أكونك أنا
و تكوني جوايا
و انسى الدموع و البكا
و تكوني ضحاكة
ف هاقول يا رب السما
ياللي بإيديك بُكره
طمّن بقى قلبها
ما تخلنيش ... ذكرى

....

كان في التحرير

انا لسه باسافر في منامي
لبلاد بتعيش الحب بجد
الناس مش خيفة لنتوجّع
و لا تكره يوم و تدوس على حد
في منامي باشوف بساتين طارحة
و زهور بتفرّق أحلا عبير
عصافير و طيور دايمًا سارحة
و وشوش بتوزع ضحكة و خير
و عيال في عندهم ألف دليل
على إن الكون مليان أفراح
بيسيبوا البسمة ما يحبسوهاش
بيخافوا ف لحظة يشوفوا جراح
لبلاد في الأول و الآخر
بتسيب في قلوب الناس علامات

شوارعها مداين مش زحمة
و لا مرة تشوف طريق إشارات
الناس متسامحة و بتعدّي
و توسع للمحتاج في حارات
لبلاد الخوف سابها و هاجر
و القسوة انتحرت ما بترجعش
و الغل الفاجر ما بيسواش
بيبور ف السوق دايم ما اتباعش
و بشاشة الوش تشوفها كثير
حتى المشاوير .. ما بتحتاج وقت
ملغية هناك كلمة تأخير
و لا حد يقول لك فيه عوّقت
إنما كان نفسي أقوم من النوم
ألاقيها حقيقة و مش أحلام
و الناس بتبص ف وش الناس
بقلوب مليانة بخير و سلام
فيا رب يا عالم بالأحوال

و بأمرك كل الكون بيسير
أنا رافع إيدي إليك بسؤال
إشمعنى دا كان وسط التحرير ???

....

رجوعك

لما تشوف في عنيا دموعك
و انا باتمنى ف لحظة رجوعك
لما بروحي ألف ربوعك
و اسأل عنك ابقى أهتم
بص ف كل حاجات امبارح
و انت بتضحك أوى أو سارح
مش على غفلة تروح و تبارح
و تغرق أحاسيسى ف هم
راجع مرة حبيبي كلامك
طيب هات لي سبب لخصامك
و لا خلاص توهمت ف أو هامك
إعقل حبة و فوق و اتلم
مش هاقطع شرايني و اموت
و لا هاتدارى فى بحر سكوت

هاجى لحدك تانى و افوت
و اخطف منك بوسة يا عم
و ابقى ساعتها قولّي يا سمّ

....

جواز سفري

قَطَّعت جواز سفري إليكي
و سجنّت الحلم ف سور ورا سور
مش هاعرف امسح ذكراكي
هاداريها ف قلبي و اعيش مقهور
صدقتك ياما كثير و بكيت
و حاولت أكون لك حضن أمان
و لا مرة ف قربك حتى شكيت
و لا قلبي ف يوم لمشاعرك خان
و بقيتي بتجري ف شرابييني
و بنظرة عينك كنت باطير
دوبت ف روعي حروف اسمك
و ف شوقي إليكي صبحت أسير
أيامي معاكي ما باحسبهاش
في الجنة مفيش أيام تتعد

كت جنة انا عمري ما حسيتهاش
إلا و انا ف حزنك إنتي .. بجد
بس إنتي اختارتي ازاي البعد
و ازاي هتعيشي و بينا فراق
و ازاي من بعدي هتشكي لحد
قلبك هيقولها لمين .. مشتاق
تقفشي على مين و تثوري عليه
و يسامح ياما و ما يلومكيش
و تفضفض روحك باطمئنان
مع مين فيقولك لا .. هنعيش
علشان ترتاحي هاقول لك آه
و هاطاوع بس هاكون كداب
و هاعيشك تاني لوحدي حياة
و ف سري هاقول اننا أحباب

....

قلب برئ

صدقته ف حبك أيامي
و رميت في كفوفك قلب برئ
و قرئت ف عنيني حاجات ياما
فرسمت لروحي معاكي طريق
و خاصمت الدنيا عشان بكره
و حلمت أعيش زى المخاليق
أتارينني انا تايه في السكة
و برجلي باخطي و اروح للضيقة
يا أمانى القلب اللي اتغرب
و ف حضنك حسّ بضحكة أمان
و اتمدد رغم ساعات الخوف
على فرحة رقيقة عرفها زمان
و ابتدا من شوقه يعيش و يعيش
و جمال إحساسه خلق إنسان

يا خسارة .. ف لحظة حكمتى عليه
ف الذكرى يعيش مع كان ياما كان

....

ضحكتي

أجمل ما فيكى يا ضحكتي

إن إنتى دايما من هنا

من خلف كام ضلع ف ضلوع

صدري اللي كان يهوى الغنا

و انك بسيطة و طيبة

بتغيبى دايما بالسنة

و بتفتحي ببيانك بخوف

و تملئ مش مطمئة

ما اعرفش ليه متعلمة

ترمينى دايما ف الضنا

بتحنى على كل البشر

و بتقسي على روجي أنا

....

على بابه

لما حاجات جواك تتحول
بعد البسمة ... لتوهة و جرح
لما تخاصم روحك روحك
لما يموت جواك الفرح
لما الفجر يخاف يطلعك
أو يتدارى فى ضلمة ليل
لما تحسّ الشوف في عيونك
بقى مش لاقى لبكره دليل
لما تحس إنك ... مش إنت
و وجعك ساجنك في المجهول
و الأيام رافعالك سيفها
ف لحظة موت عمالة تطول
إجري على اللى داري بك و ابكي
و ارمي الوجع المر ف كفه

و اشكي و فضفض .. و احكي و قول له
و اوعى دموعك فيك يتخفو
بوح ما تخافشي و سيب أحاسيسك
تحكي بدالك وقت ما تنسى
هو هيسمع صوتك جدًّا
و عشان حبك عمره ما يقسى
عنده تلاقى دواك مستنّي
إنك بس تروح على بابيه
فيه ترياق ... لقساوة الدنيا
ربك شايله عشان أحبابه

....

ضحكي أنين

اللي كنت باشوف بعينه
روح و قلب مصدقينه
و اللي اسمي فوق جبينه
جاي يقول مش مرتاحين
جاي يقول لي كفاية ... نبعد
بعد ما كان دايمًا بيوعد
مرة أزعل.. مرة يعند
بس كنا كويسين
كنت ياما باقول سماح
و افكر أيام ملاح
دنيا حلوة و كون براح
تسعد القلب الحزين
جاي قال بيقول نفارق
جاي يسيبني ف همي غارق

يبقى حتى الموت ما فارق
لما ضحكي يصير أنين
مش هاعاتبه أو ألومه
مش هاكون ف الليل نجومه
بس ربي يشيل همومه
و ادعي قلبي يقول آمين

....

بلا استئذان

و ييجي الليل بلا استئذان
يمد ايديه و يزرع خوف
ف روعي اللي الوجع فيها
صبح زايد عن المألوف
و يخنق ضحكة كات تايهة
و متخيبة جوّه كسوف
لا راضي ف مرة يسمعي
و لا بيراعي مرة ظروف
برغم إني بقيت درويش
و داير كعبته و باطوف
يا سيدنا الليل عشان خاطري
كفاية عليك وجع فيّا
زمان السحر كان توبك
و كان طبعك ملاغية

و ياما كثير سهرنا اصحاب

و ياما زرعنا حنّة

و على غفلة بقيت قاسي

و بقيت ناسي كما هي

بحق العشرة تنساني

و تنسى القصد و النية

و سيبك من حروف اسمي

و لون الدمع ف عنّي

....

أحلام بريئة

كنت محتاج أبقى طایل
م النجوم أقربها منك
فاخطف النور اللي فيها
و آجي اعاكس بيها سنك
و اشتري من بكرة ساعة
حتى لو بالعمر كله
أعملك بستان محبة
إنتى ورده و إنتى فله
الغريبة إنك مشيتي
من طريقي فتوهت فيه
كل ما سأل حد عنك
الجواب مش بالتقيه
اللي يسكت و اللي يضحك
و اللي يرمي ف وشي طوبة

و اللي يلعن ف اللي جابك
و اللي يتمنالي توبة
هو فيه إيه ما تقوليلي
همّ ليه بقوا يكرهوكي
دول زمان كانوا دابوا فيكي
همّ ليه مشيوا و فاتوكي
ياه .. نسيت إنك نسيتي
كل حاجة حبيناها
بعتي أحلامنا البريئة
اللي كان عشقك ثناها
و الوجد بقى صوتنا فيكي
للي نفسه تكوني حاجة
و اللي يوم عشناه معاكي
صرتي بتسميه .. سذاجة
و ابتديتي تحبي غيرنا

....

حلم ف عمري

كأنك لسه لمساني

و شايفاني

لكن ساكتة و ما بتحكيش

كان إيديكي في إيديا

و حضناني

عشان أرجع و فيكي أعيش

كان عنيكې خطفاني

و شغلاني

فتبقى الدنيا عندي مفيش

مفيش إلا انتي ملياني

يا أكوانى

يا حلم ف عمري ما فارقنيش

....

لسه بحبك

كنت هاقول انا لسه باحبك
بس خلاص مش قادر اقول
ما انتى نسييتى ان انتى حبيبتي
و انك عرضي .. و إني الطول
و انى سقيتك دم اخواتي
و انى وقفت ف وش الغول
كنت هاقول انا لسه باحبك
و اني شايلك حلم جميل
و اني وهبتك بكره و بعده
و اني دفعت عيونى دليل
لكن قلبك أصبح ميت
شايف بس اللي كرهناهم
فاتح ليهم حزن حنين
طيب كنتي خدينا معاهم

ناسية حرارة و الواد مينا

و الشيخ عفت و الباقيين

بيعتي قلوب كات عاشقة ترابك

و اتزوقتي لناس تانين

ما بقاش فينا نفس نتكلم

و الميادين قفلوها علينا

فاتحة سجونك و بتختاري

كل صباح تسجني مين فينا

....

مناجاة

نظرتك يا ربى رحمة
للقلوب الموحوعين
وسط عالم كله زحمة
كله خوف .. مليون أنين
و فى خزاينك .. كل راحة
كل شئ طيب .. جميل
اشفي روحي .. من جروحي
دلني فين السبيل
خد بايدي لدنيا واسعة
فيها راحة البال دليل
و ان لقيتني بعدت عنك
شدني .. و املاني طاعة
خلي نفسي تبقى هادية
و املا قلبي بالوداعة

خلي شجري ببقى طارح
بالإيمان ... و استر طريقي
ببقى حبك فيا ساكن
في الشدايد كون صديقي
كون لى نور يهديني دائماً
لما ببقى ف روعي خوف
و ان قسيت و الضعف ساقني
خلي عيني ببك تشوف

....

باختصار

الحكاية باختصار

إنى عاشقك مش هزار

و انى لما باشوف عيونك

عيني بتشوف النهار

و ان لما الليل ببيجي

و القمر بيعت لي نوره

باشتهي نظرة عنيكى

و اللي كان باسرح و ازوره

و احضن الذكرى اللى كانت

لما اول مرة شوفتك

صدقيني إن عمري

ابتدى لحظة عرفتك

...

مِيزَة

يا فاكِر إن فيك مِيزَة
خِلاف الخلق و مقَدَّر
يا طالع فوق أوي عالي
على اللي معاك و متمنظر
و بتشوفك كتير عالي
و متصدر و متكبِّر
كتير زيكَ صحيح لكن
بفعل الدنيا متحسَّر
لا هو شابب على ضوفره
و لا جامد و متحجَّر
فحاول تفتكر دايمًا
بإنك حاجة مش أكثر
لا كنت داوود و لا سليمان
و لا تعرف ف يوم تسحر

و لا عندك عصا موسى
عشان بغاوة تتكبر
دى لطشة برد تلعبك
فنتبهدل و تتكدّر
و كلمة تبيّتك صاحي
عشان مهموم و بتفكر
بكلمة تشبّ بضوافرك
و تتعايق و تتغندر
فحاول تفتكر دايمًا
بانك ... حاجة ... مش أكثر

.....

باب الحلم

باب الحلم الواسع جدًا
ليه في ساعات على غفلة يضيق
جنبك يكبر يكبر يكبر
و إنت أساسا كنت جرى
خوفك يملأ العالم كله
و انت تسلم يوم ورا يوم
تبقى الدنيا سواد في عيونك
تصحى كئيب فتنام مهموم
طب ما بلاش م الأول تحلم
و لا بلاش ف الحلم تعيش
و لا تتقى الحلم التافه..
جدا جدا ... زي مفيش
حيرة تجرك على ميت حيرة
و الأيام مش صابرة عليك

تطفي ف قمرک .. تسرق عمرک

تحرق وردک علی أراضیک

فاحلم حلم بسیط علی أدک

حلم إیدیک بالراحة تطوله

حلم تصدق نفسك لما

أدام نفسك مرة تقوله

....

ولا مكسوف

و ان روحك ندهت على روحك
خليها ترد..... و ما تأخرش
سيب كل الكائن فيك بهدوء
يظهر في الصورة .. و ما تفكرش
إتعلم تبقى صريح وياك
و أمين .. مش خايف و لا مكسوف
و قيود الكون العايشة معاك
كسرها و دوس كل المألوف
دا لقاهم صدفة و حلم بعيد
لو مرة حصل ما بيتكرش
فاغتنم الفرصة و كون .. فتكون
بس اما تكون ...
قول و ما تنكرش

....

محتاج تحكى

لو مرة عنيك قابلتها عنيك
بص لها بشوقك ... ما تبالحقش
خليها تشوفك من جواك
ركز لتفوتك و ما تلحقش
فأكيد محتاج تحكيلها كثير
و الوقت ساعتها ماهوش مفتوح
مش لازم تسرح في التعبير
دي عنيك لعنك بشويش هاتبوح
في دقيقة و حرر إحساسك
و اديله الإذن .. مفيش إحراج
علشان لو فات الوقت و ضاع
مش راح تلاقيه ..
و انت المحتاج

....

بتصاحب أوجاعك

و كثير في الخوف نمشى المشاويير

هياها سكك من غير تغيير

لا بنعرف مرة نقول لأه

و لا مرة نخالف خط السير

الدنيا يادوب كالخمارة

بتصبّ الكاس ... تشرب ميت كاس

تهرب من روحك في همومك

و تغيب البسمة من الإحساس

لا بتعرف يوم تسمع صوتك

و لا تنطق مرة و تتكلم

فبتغرق دايماف سكوتك

و مداخل روحك تتألم

و ان مرة حاولت تكون إنسان

بيبوح و يفضفض و يعبر

هتلاقي منين ناس تسمعلك
ما اللي هيسمعلك فيه أكثر
فى الليل بتصاحب أوجاعك
و دموعك تجري على خدودك
و ف لحظة تلاقى الكون باعك
و بقيت مسجون بره حدودك
لا بترجع تسأل عن روحك
و لا روحك جواها إجابة
خيالاتك تاخذك و تجيبك
في حياة صبحت فعلا غابة

....

حاسب تموت

يا معلم الحلم السكوت

حاسب ... تموت

ياللي انت بتخاف م السما

إرمي الغما .. علشان تفوت

فاكر خيالك مختفي

و بتكتفي .. باللقمة قوت

صدقني لو موج البحار

شافك و ثار

مش راح تشوف تانى الشطوط

و هناك .. هياكلوك ألف حوت

فافتح لحلمك سكته

لا تسكته و لا يوم تبيع

خليه في روحك ... يسكنك

و احلفه لم يوم راح يضيع

ما انتاش وضيع
و لا اقل من ناس اشترت..
بكره اللي جاي..
و باغلى شئ
ما خافوش من الموت في الطريق
و لا حسُّوا غير إن الأمل لِسَّاه برئ
لِسَّاه و في نهاية الطريق محتاج يكون
فبلاش تخون
و اركب بساط المستحيل
علشان تشوف في الكون براح
كرر كتير جواك أوي
لازم أرجع حلم راح
و هافك قيد المحبوسين و ابدأ سنين
ما فيهاش جراح

....



سلطان

لو السلطان ولد طائش
و ناسي الحلم مش عايش
و شعره للغلط لايش
فانا السلطان
ما انا باختار حروف و حروف
و باغرق في الحياة و اطوف
و عشت ظروف في حضن ظروف
و عاشق بنت ملك الجان
فانا سلطان
بحور الشعر ياما حاولت أفهمها
ما بافهمهاش
قوافي كثير تشاور من بعيد ليا
ما باحفظهاش
و علشان وزنكم قاسي



باقوم ناسي و ما اوزنه‌اش
و اقول ما بلاش
و حدّ الله ما بين الوزن و الوزّان
و هي لو كده تمشي بدون عنوان
و لو رصّ الحروف ينفع
نسميه كلنا شاعر أوى و فنّان
فانا سلطان
أنا ... اسف
مانيش سلطان
و بين الشعرا مالي مكان
أنا ... انسان
بجد باحاول أتعلم ...
أصول القافية و التبيان
و باجرى خلف من يكتب
و باحترم اللي حرفه ميزان
كتير اغزل خيوط موقف انا شوفته
أنا عيشته

أنا سمعته و لو نسيان
حاولت كثير أكون واحد من الشعرا
و اشد القول
لقيتني باتوه فى وسط كلام
و مش لاقى طريق لوصول
فمش معقول
اقول عن نفسى و اوصفها فاقول سلطان
انا يا اهل الكلام فعلا مانيش شاعر
أنا لو كنت راح احكم
و راح اوصف ...
هاقول إنى
يادوب إنسان
....



مش سلطان

أنا لا مؤاخذه مش سلطان
و لا شاعر .. و لا فنان
و لا بامسك قلم ساحر
و لا باكتب على الجدران
انا من جوه حد بسيط ..
و تايه لسه في العنوان
قريت دواوين من الأشعار
و ليل و نهار
باحاور فكرة جوايا
و اقلبها يمين و شمال
و ابدل في الحروف ياما
و اقول يمكن ف يوم تتقال
و لو موال
صحيح عثمان أكون شاعر

يسجّل حبه لمشاعر
بتسكن جوه فى الوجدان
لكن لسانى مش عارف
و لا شايف لبحر الشعر شط قريب
تملّى الموج يكون عالي
فيحلاّلى اعافر او يكونلى نصيب
و فى الآخر باسيب روي
عشان بوي يعبرّ عن حاجات فيا
و اسيب الحكم فى ايديكم .. و اثق فيكم ...
و احس كلامكو ملاغية
عشان هي
حروف القول يجوز مرة
بجد تتول رضا السلاطين
و فرحان بالرضا شوية
.....

دموعى ضحكاية

أنا عشت مرة ف وجع

ففسيته جوايا

أسقط و أقوم و ارتفع

و دموعى ضحكاية

ياما ضربت الودع

و سافرت ويايا

و هناك عملت البدع

و غرقت في حكايا

لا صوتي مرة اتسمع

و لا قلوي كان آية

مرسالي لم يوم رجع

و لا روعي نساية

لا عرق همي اتقطع

و لا قولت دي نهاية

مع اني ضد الطمع
راضي .. و ده كفاية
بيقولوا عني جدع
صاحب .. و نسماية
ما اعرفش .. دايمًا باقع
فى الراحه و الجاية
توبى نضيف م البقع
و عيونى بكاية
و حظي .. يوم ما انتصف
غرقتني في بكايا

....



آه و أنين

ما بين ضحكة على وشوشنا

و شئ جوانا بيحوشنا

و تفاصيل ضايعة ف رتوشنا

قضينا سنين

و لوم و عتاب مالوش آخر

فنتأخر

و يبقى الجد قول ساخر

ما يملا العين

عيون فيها البكا حرّاق

و ليل و فراق

و زيف على ضحكة ما تنطاق

و آه و أنين

و تبقى الفرحة بتعافر

وجع كافر

و تنزف حزن فتسافر
لناس مش زينا خايفين

....

وجع الأوهام

و الصمت الخايف ...

في الأحلام

و دموع و خصام

و نجوم في الليل

مش عارفة تنام

و انا و الأيام المسروقة

و خاطفها الشوق

و دموع بتقرّب و بتبعد

و كلام مخنوق

و وداع بينادي على التوهة

برة المعقول

و النبض المهموم في ضلوعي

و مرار القول

و انا و انتي و شئ استنيتيه

بس ما بيچيش

جاو بينى بجد

أنا إيه فيكي...

ما تعذبينيش

....



قمار

و هالعب بك قمار تاني
يا عمر لقيتك بالصدفة
و اعيشك من سكات عاشق
غرق في غرامه و استكفى
هرب من برد أيامه
لحزن حبيبته ... فاتدفى

....

ما بتحكيش

لما سنين العمر تعافر
إنها تفضل و ما تمشيش
لما النوم من عينك يهرب
لما بتسكت و ما تحكيش
لما خيوطك تبقى خطوطك
تايهة ما بين كان ليه و ازاي
و الأحلام تستنى ف موتها
مش عثمانة ف بكرة الجاي
و انت ف نفسك تبقى لوحداك
خايف تحكي عليك جواك
نفسك تقفل باب أفكارك
و انت نهارك مش وياك
عندها ... كل الكون ده بيصغر
و تبقى نجومه نقط على كفك



شمسه و قمره و صبحه و ليله
كلها تبقى بعيد عن صفك
تسكت روحك ... مش في سكينه
خايفة ... حزينه ... و شبه الموت
حتى الضحكة البايته ف وشك
تبقى بتدعي ... يا رب تفوت
ما انتاش عارف حتى تعبّر
علشان تعبت كل حروفك
و انت زهقت ... كرهت كلامك
يمكن حتى نسيته ف خوفك
فجأة تزغل عينك منك
فجأة تحس بإنك حيّ
فجأة عروقك تبدأ تنبض
فجأة يطلّ ف روحك ضيّ
فجأة نجوم في كفوفك تصحى
تملا سماك و تنور ليلك
فجأة حروفك تبدأ تنطق

تبقى قصايد و تغنيك
يكبر كونك غصبن عنك
أو بمزاجك ... و انت بترضى
قلبك يرجع يسأل عنك
و من الفرحة الروح تتوضى
يبقى أكيد شئ هزّ مشاعرك
حرك فيك أحاسيس كات ماتت
أو أحلامك أو شئ منها
رجعت بيك لسنين كات فانت
تلاقيك تاني بتعرف تضحك
لما بتسمع إسم بذاته
روحك ترقص لما تشوفه
قلبك تصرخ فيك دقاته
ليلك يسهر يسمع منك
صبحك عينه مالياها سؤال
بس سؤال مش ليك ... ما تخافشي
و لا هتلاقي جوابه معاك

هل حبيت؟؟
هتقول لأ طبعاً
بس حاجات جواك...
فضحائك
....

كفاية عناد

هاتيجي أكيد

و اقابل حلم متداري

ما بين آهة و بين تنهيد

و اشوف في عنيك جمال عشقي

و احسه في لمستك بالإيد

هاتيجي أكيد

و هتجيلي معاك بكرة

اللي ياما عشت باستناه

هتبقى معاه

و هاسمع قلبي في ضلوعك

بيندهلك كفاية بعاد

كفاية التوهة في الفرقة

كفاية عناد

كفاية ضحكتي تدبل



عشان بنخاف نعيش فيها
يا أجمل ضحكة في الدنيا
و انا قلبي أسير ليها
هاتيجي أكيد
و يحضن شوقي إحساسك
و في لقانا ندوب تاني
و هاحلف لك ما اغيب عنك
و تحلف لي ما تنساني

....

شبه الوداع

كانت السنين أكثر كثير
من حلم مسجون في الأنا
أكثر من القول في القصيد
و ابعد كثير من دندنة
مرت كسبحة بتفرط
حباتها بين ازاي و فين
تهرب من الخوف للوجع
فتفضي كاسات الأنين
تسكر في روى الأمنيات
فتموت على سكة ضياع
عدت بقلبي في ميت وطن
دايما لقاها شبه الوداع

....

بتحيي قلوب

وحشني الحزن و الضمة
و نظرة عين ملانة شوق
و بسملة حلوة في شفائك
و توهة نفسها ما نفوق
و حشني تلمسك إيدي
و ف عنكي مشاعري تدوب
و حشني همستك ليا
و قولة آاه بتحيي قلوب
....

سامحيني

ساعات لما تنادينى

بالاقينى ..

مانيش قادر أقول حاضر

و لا جايلك .. و لا جنبك تلاقيني

لا انا زعلان و لا خايف ..

و لا اتمنيت - و انا مسامحك -

في يوم انك تسامحيني

لكن موجوع ..

ومش عارف اقولك ليه ...

- و انا عاشقك - خاصمتيني

ساعات لما تنادينى

باكون سامعك

و مستحلي صدى صوتك

و اسيبه يرن في وداني

و تتلخبط حروف الرد في شفائفي ...

و مهما حاولت ارتبها

ببتمرد على لساني

أحس ساعتها بجروحي بتألمني ...

كأن جروحي في بعادك بتتجدد

وترجع ثاني تتفتح

و من تانى

و في خيالي أحس بلمسة من إيدك

بتتسحب على جرحي تداويني

يطيب الجرح و الاقيني ...

ما انيش عارف أقولك ليه ..

— وانا عاشقك — خاصمتيني

دا انا حتى بعيد عنك

ما بأقدرشى أشوف غيرك فى أحلامى

و لما حرف من اسمك يشاغلني ...

و ييجي غصب في كلامي

تروح البسمة مرسومة على وشي ..

و تتبعتر على كيفها
بدون ما اشعر في أيامي
و احس بدمعة محبوسة
بتمرد على عيني
و الاقيني و انا بابكي باهيم فيكي .
ومش عارف اقولك ليه
- و انا عاشقك - خاصمتيني
و انا برضو ما باعرفش
احس بصوت خلاف صوتك
و بتدور لحظتي بيا ..
وانا تايه و مش داري
لأنني غرقت في سكوتك
الاقى ذكريات شاردة بتندهلي ..
اعيش فيها ..
و اخاف اللحظة دي تفوتك
عشان لو فاتت اللحظة اللي...
مشاعرها بتحييني



بابات موجوع ..
و مش عارف أقولك ليه
- و انا عاشقك - خاصمتيني
ساعات بأهرب في أحلامي لأحضانك ..
و اروح لبعيد
اشوف نفسي على صدرك ..
و الاقيني في نفس الحلم بأتواعد مع المواعيد
و جوه الحلم اقابل حلم يعرفني ...
و انا عارفه ..
و فاكراه و بالمسه بالإيد
اقول يا حلم طول بيّا ..
الاقى حلم بعد الحلم من حضنك يصحيني
واقوم مفزوع ...
و مش عارف أقولك ليه
- و انا عاشقك - خاصمتيني
و لما ارجع
ادور فيّا عن صورتك ..

و انا خايف متعرفنيش
الاقى كل شئ فيا عليه صورتك
و حاضنها عشان ما يعيش
كأنك و انت نسياني ...
نسياني طلعتك فيا ...
دفا في البرد ما يسيبنيش
ساعتها بالتقى نفسى
بأقول حاضر
و اقوم جايلك و حوالىكي تلاقيني
وانام تاني على حجرك
و الاقيكي
بدون م أسال جاوبتيني
بانك فى الغرام زي
لا انا خاصمتك
و لا انتي في يوم خاصمتيني
.....

الشاعر في سطور

- الإسم / فهمى على عبد المطلب نصر
- الوظيفة / مهندس - رئيس شركة
- الحالة الإجتماعية / متزوج ولديه ولدين وبنيتين
- صفحته على الفيس بوك

<https://www.facebook.com/profile.php?>

1. . . 1. 299244919id=

صفحة شعر على الفيس بوك : مشاعر بجد

<https://www.facebook.com/%D%9B%D%A%D%B%D%AF-%AC%D%D%A%D/87439.44267387>

صدر للشاعر

- ديوان سكت الكلام (شعر عامية) ٢٠١١
- ديوان لأ..مش أصحاب (شعر عامية) ٢٠١٨

الفهرس

م	القصيدة	الصفحة
١	بطاقة الكتاب	٢
٢	الإهداء	٣
٣	بنوتة رقيقة	٤
٤	خطاوي	٦
٥	ضحكة توهة	٨
٦	صاحبي	١١
٧	أعذروني	١٣
٨	حرف القصيدة	١٥
٩	حاجات خائفة	١٨
١٠	عُقد الغرام	٢٠
١١	ذكرى يوم	٢٢
١٢	إفتحيلي	٢٥
١٣	لحظة اشتياق	٢٨
١٤	الصبح مجاش	٢٩
١٥	راجع	٣١
١٦	إتمنيتك	٣٣
١٧	يابكرة الجي	٣٦

م	القصيدة	الصفحة
١٨	أعذارك	٣٧
١٩	كلمة بحبك	٣٩
٢٠	الأماني الممكنة	٤٢
٢١	وجع	٤٣
٢٢	دنيا سارقة	٤٥
٢٣	غمزة عين	٤٧
٢٤	صورتي	٤٨
٢٥	وشوش	٥٠
٢٦	كدابة	٥١
٢٧	حلم حلمه	٥٣
٢٨	من ثاني	٥٤
٢٩	بكرة	٥٦
٣٠	كل أحلامي	٥٨
٣١	جوه الروح	٦٠
٣٢	حاجات بتضيع	٦٣
٣٣	قصايد يتيمة	٦٥
٣٤	كان في التحرير	٦٧

م	القصيدة	الصفحة
٣٥	رجوعك	٧٠
٣٦	جواز سفري	٧٢
٣٧	قلب برئ	٧٤
٣٨	ضحكتي	٧٦
٣٩	على بابيه	٧٧
٤٠	ضحكي أنين	٧٩
٤١	بلا استئذان	٨١
٤٢	أحلام بريئة	٨٣
٤٣	حلم ف عمري	٨٥
٤٤	لسة بحبك	٨٦
٤٥	مناجاة	٨٨
٤٦	باختصار	٩٠
٤٧	ميزة	٩١
٤٨	باب الحلم	٩٣
٤٩	ولا مكسوف	٩٥
٥٠	محتاج تحكي	٩٦
٥١	بتصاحب أوجاعك	٩٧

م	القصيدة	الصفحة
٥٢	حاسب تموت	٩٩
٥٣	سلطان	١٠١
٥٤	مش سلطان	١٠٤
٥٥	دموعي ضحكاية	١٠٦
٥٦	آه وأنين	١٠٨
٥٧	وجع الأوهام	١١٠
٥٨	قمار	١١٢
٥٩	مابتحكيش	١١٣
٦٠	كفاية عناد	١١٧
٦١	شبه الوداع	١١٩
٦٢	بتحيي قلوب	١٢٠
٦٣	سامحيني	١٢١
٦٤	الشاعر في سطور	١٢٦
٦٥	الفهرس	١٢٧